

Arno Camenisch – mund sutsu

In film realisà da RadioTelevisiun Svizra Rumantscha

■ (rtr) Arno Camenisch è in trendy scrivent sursilvan. En ina coproducziun da RTR Radiotelevisiun Svizra Rumantscha e Topicfilm han Christina Pollina e Gian Ruff accumpagnà Arno Camenisch sin ses viadi a New York ed era visità cun el ses vitg nativ Tavanasa. Il film «Arno Camenisch – mund sutsu» vegn emess dumengia, ils 22-02-2015 a las 17.25 en ils «Cuntrats» da RTR sin SRF1.

Gugent fiss *Arno Camenisch* daventà ballapedist. Il talent avess el gi. Oz gioga el cun plects. Il star da pop scrivend, oriund da las muntognas, per il solit cun chapitscha, è ina marca da la scena da literatura svizra. Ses cudeschs, repetidamain undrads, èn da leger en passa 20

linguatgs. En ses texts fa el or dal pitschen mund la gronda tribuna. Perquai vegn el chapì dapertut. Tant a New York City sco a Grüşch u a Bienna.

Creschì si è Arno Camenisch a Tavanasa, in vitg sumbrivaun en la Surselva. Sco mattet ha el stuì ir ad alp – lavurar sco in pauper galiot, da l'alva fin la brina. Ils culms n'èn betg idillics per Camenisch, anzi, els inquieteschan sco ils sgrattatschiels da New York. Là è el ì l'atun passà per l'emprima giada. En la valisch ina stanga cigarettas e «Sez Ner», ses bestseller, en englais.

Il film da *Christina Pollina* e *Gian Ruff* accumpogna Arno Camenisch sin ses prim trip en la metropola americana. Ed era qua chatta el las pitschnas istorgias, ils originals, ils agens. Il sound ritmic da ses text sa maschaida cun las ramurs da la citad canerusa. Ma il film turna er tar las ragischs dad Arno Camenisch. A Tavanasa entaupa el umans che fan alas a sia litteratura. E lura less el finalmain era savair da ses bab tge che lez manegia da ses figl e sia vita sco scrivent. Co san ins scriver da las experientschas fatgas? Co scriva in che n'ha legì nagut fin ventg? Arno Camenisch ans lascha prender part da la naschientscha da ses microcosmos, da ses clips da video litterars.



Arno Camenisch

MAD

Il film da l'emissiun «Cuntrats» vegn mussà sco suonda: dumengia, ils 22-02-2015, 17.25 sin SRF 1
Repetiziun: sonda, ils 28-02-2015, 17.10 sin SRF1